

太

函

集

太函集卷之四十一

新都汪道昆伯玉著

行狀九首

明奉直大夫東津鮑公行狀

丙辰夏五月壬午東津鮑公以天年終諸子將奉公
喪待吉於竹圃之北屬余載公質行之可書者將謁
良史圖不朽之事焉公名冕字惟瞻歛棠樾人也諸
鮑棠樾最鉅其先世載國史中在宋其遷祖紹一府
君割田百畝入靈康院守者至今祠事之元處士竹
圃先生其後也處士散金募士捍鄉人之難死之至

公曾大父庭亨公大父存脩公家世誦義以雍睦顯
贈大夫誠菴公爲存脩公中子昏太宜人謝氏以成
化辛丑冬十一月生公公能言輒敏給如響善記誦
贈大夫賈淮洛公以童子從淮洛人乃大奇之相語
曰鮑家兒必大其門丈人惡用賈公遂脩俎豆之業
受毛詩及成人慷慨持大體會豪沒其先世墓公首
事爭之客目攝公布衣其柰豪何公勃然曰直以身
抵之耳事聞豪斂手還故地弘治正德間公兩以民
間秀異應鄉舉補縣文學諸生公倣儻敢言嘗請罷
築城禁遏糴均租庸諸便宜事有司嚴重之即公數

奇其聲名籍甚及門之士無慮數十百人 今上七
年公舉於鄉凡三上春官不第十四年公待命吏部
謝太史習知公力沮之曰子負千里材柰何局趣轅
下公泣下謝曰冕父在春秋且八十矣願猶然蠕望
謂親不逮何 上優其材拜晉寧州太守公趣歸爲
贈大夫壽明年入滇公以無害得民和吏治日起閩
帥王守中被逮公力出之十八寨吏目牛某醜死公
發其奸狀激江令與學官子弟有卻監司使公居其
間公至數言而解居四年晉寧大治御史大夫若部
使者行縣以爲能乃交薦公公方上程書尋奔贈大

夫喪去既祥公以課最進奉直大夫贈父母視奉直法遂補建水州無何改福建市舶司提舉公往來道晉寧故父老皆扶杖郊迎願少須臾無去州大夫張君坐公東鄉受成焉及入閩亭市法約束駟僮島夷懷之上官方引用公公以疾致仕去比還田里視故業無所增齋用董董耳居常從宗人長老爲樂暇則肱篋讀書其季年所著有東津漫稿公不問家屬伯子良守持家秉仲晉守季可守籍名博士舍中即遇諸子有恩然不少貸嘗手書于庭示以砥行立名爲務諸子奉命惟謹父黨推轂之及公疾革諸子問所

欲言公瞿然曰吾起身草野一命而爲大夫即無所建明然猶不失爲廉吏而等第操本業無忝爾所生足吾願矣公少年不得志旦夕備甘毳必當父母心太宜人有少女甚幸之及其有家公爲之治具過盛太宜人意甚得公叔世衡公無子公父事之其養與饗視贈大夫等盖力行孝弟出入不倍于人倫故能盡職無缺以令名終非苟而已也公昏程宜人舉伯子繼汪宜人舉仲若季長婦許氏次鄭氏次胡氏長女歸太學生汪尚序次歸潭濱黃山奇孫男五恩光恩典恩宣恩寰恩寬孫女二尚幼其在婚姻皆邑中

著姓於法得書

明故中憲大夫都察院右僉都御史霽寰先生

吳公行狀

隆慶三年春二月甲子故都察院右僉都御史霽寰先生卒于家春秋五十六耳諸子將奉大事屬余小子布狀行且謁張相君殷宗伯爲碑爲銘昔在南宮三人皆出先生門下即余小子無能爲役其何敢辭先生諱維嶽字峻伯孝豐人姓吳氏其先自淮海扈宋南渡居孝豐明興先生六世諸祖並顯其一歷通政司叅政其一守萊州至大父吏部公家大起吏部公

二子並登進士長公麟由御史歷山東按察司副使
以親老乞歸次公龍由吏部郎中歷叅政吏部公賜
爵如子配張氏封宜人當是時門戶赫然盛矣宜人
夢天女授美子曰帝畀汝孫於是冢婦方恭人有身
以正德九年六月四日舉子宜人昔夢庭下立柱石
千仞上屬于天長公亦夢舍後山高出雲端巖巖嶽
立則以爲貴徵也因命名竒之先生頎而莊英氣勃
勃始就外傳日誦數千言始勝冠輒起民間首諸生
籍嘉靖丁酉鄉試先生以執禮舉第五人明年舉進
士除江陰縣令操法得民會沙賊僭號反崇明與縣

夾江相距縣故無城郭先生躬率甲士謹備之賊無
敢犯江陰完境內三載應 召得刑部尚書郎先生
明習法家主部尚書奏讞 詔定問刑條例部尚書
舉以屬吳郎於是吳郎具藁部尚書籍上之大稱
旨著爲憲令庚戌虜大入 詔收兵部尚書坐吏議
輕連議者吳郎從容上疏曰尚書無他獨事重重發
耳不聽然廷中獨多吳郎慮囚江西囚得從末減者
萬五百仇者侵徐滾毋塚滾般之先生當曰滾以毋
故殺人且侵塚在辟滾得免劉福德讓里媼子不孝
里媼子出惡言福德怒毆殺里媼子先生當曰誅不

孝柰何與不孝子等死邪從輕議釋之朞月而徧部
中法無不當旣歸省居大父及父母喪泣血三年目
幾眇喪畢補駕部尋轉按察司副使督學山東先生
下車操功令唯謹謁闕里徘徊洙泗鄒嶧之間檄孔
顏孟三氏教授司定約法勒石學舍宣言曰建首善
請自三氏始其世世守之廣厲諸生務在躬化所至
左右文行無不當于人心追祀名宦鄉賢表章節義
齊魯之士烝烝鄉風居五年進湖廣布政司右叅政
尋進江西按察司按察使已復拜都察院右僉都御
史巡撫貴州言者謂三省竝建撫臣請罷督府廷議

貴州當楚蜀之會今巡撫具文武材其以川東湖北
轄貴州罷督府便先生上便宜五事 上納之貴州

半雜夷道多剽掠乃馳羽檄分道遣材官護游校偵
察之嚴踐更懸賞格夷寨各立夷長籍記寨中諸夷
若干人保界分區界內有犯坐夷長於是諸夷無敢
竊發道乃通夷酋楊珂仇其叔進雄據六洞先生則
以進雄故立珂爲後後有子欲殺珂諸夷將釋憾於
進雄無所發珂急率憾者距進雄歷十有七年當事
者議未決乃授有司方畧責珂降珂乃面縛伏辜待
以不死事上 詔賜白金文綺論功有差於是先生

部署諸夷法不軌者時王世麒叛清浪宋廷武宋鵬
宋鶩叛草唐王阿利等叛平伐先生筴曰世麒祖父
逆節父漏天誅乃今濟惡不悛亟誅世麒以正國法
諸宋由爭襲起黔蜀觀望三十餘年出其不意急縛
之一旅足矣平伐負固爲虐可襲而禽於是斬世麒
捕廷武鵬鶩俘阿利境內悉平會有人言先生以改
南去先是先生聞仲弟維庭病甚則自江西趣歸未
至而仲亡哀之甚會程期急尋以單車赴貴州居常
念仲不忘食浸減驛書至先生頓首曰臣不幸有狗
馬病使臣得歸骸骨終餘年君之賜也先生彊直

方正不取苟容初對公車長公所善故人在供奉先生無私謁心望之先生射策得當執政間且薦高等故人匿先生牘遂不前居江陰會舒御史汀行縣故事御史謁廟縣官長跪候車御史方齟齬諸縣官暴甚先生倡言曰天子置縣官南面而臨百里且先師在奈何曲跽而巉橋門御史目攝之然卒未有以中也始爲郎吏部尚書熊公浹請以吳郎調吏部坐不拜嚴相國議格不行嚴相國屬先生序鈴山詩先生固辭謝留山東不調客以行間說先生先生謝曰僕待罪儒宗終不以善仕而間相國坐泰安州試士

段御史顧言且按部來有司請避舍以居不許藩臬大夫畢從御史登岱先生獨留不行及赴江西監司遇御史京口前驅不避御史御史嚙之上遣使者出貴州使者失望尋中以飛語御史亦倡議南中嗟乎直道不容即明時不免耳始歸田里季弟維京亦自禮部移官先生語曰吾結髮入官齒駸駸暮矣自今惟日討諸子而訓忠孝力耕稼供田租此吾事也季齒壯其毋忘先業以報國家比年讀書灌園將以家食老矣季轉南京刑部省先生于家會先生哭嚴氏女過哀病大作踰月而病革召季及諸子屬後事

語甚詳顧謂鄉人某子甲往饋朱衣母以歛乃瞑先生受室長興臧氏封安人贈恭人舉子男一人女三人其父應奎故以禮部主事諫先帝今上即位贈光祿寺少卿繼恭人陳氏爲永嘉萬戶鈇女舉子男二人女一人長子稼端補縣諸生娶歸安陸侍郎穩女次稼翊聘秀水項吏部治女次稼澄聘烏程閔茂才一鶴女長女適華亭太學生馮繼可次適烏程太學生茅用吉次字烏程閔世南先生家世蓋州顧折節務恭儉年少嫻於文學終其身不衰始從宦京師執舉子業師事袁郎袁莊郎用賓既而講德脩辭

師事毗陵唐太史應德從毗陵諸令善臨川徐良傳
臨朐馮惟訥從諸尚書郎善濟南李攀龍江東王世
貞武昌吳國倫廣陵宗臣朱曰藩當是時濟南江東
竝以追古稱作者先生即逡逡師古然猶以師心爲
能其持論宗毗陵其獨操蓋有足多者乃今遺文具
在大都載奏議及歲編中

明故封南京兵部車駕司員外郎程公行狀

歲丙寅秋八月二十七日封南京駕部員外郎程公
以天年終余始放歸伯子嗣功屬余爲公狀程自鼎
山府君善先大父公復善家大夫比余從伯子游蓋

交驩三世矣伯子顧當大事余何敢辭公名俱字守約別號野亭鼎山府君季子也日者謁府君季子必貴府君亦以其有貴徵也遣伯仲入浙受賈獨季受經居無何家難作府君命季釋業時公爲童子輒以良賈聞其後伯仲自請於府君願挾貲入閩利且倍府君戒勿往伯仲遂行公獨奉府君居浙中脩故業既而伯仲皆不利損資斧有差則又抵府君請復合如故府君有難色私語公公謝曰賈爲利謀耳伯仲慕利故去失利故來願大人勿距其來兒何敢論羸訕府君謂善居二十歲業乃大成當是時伯仲諸子

長矣公舉三丈夫子皆幼冲伯仲亟欲分財公固請
合不可公以獨身攝内外事齎用益饒則以先世自
文清公相宋率用儒術興予從先考受經未卒業願
自今程督諸子脩儒術毋傷先考心於是延師課業
不遺餘力辛丑督學使者行縣余從仲子嗣勲補諸
生丁未余對公車則又與伯子同籍比領縣伯子得
武康公如武康視伯子爲邑狀居踰月公喜曰邑猶
美錦令則製之孺子結髮入官即使學製而翁項項
然恐不勝任乃今能事而翁無恐矣遂還里中悉以
家秉授叔子嗣烈其後伯遷留都遷蜀遷楚遷浙往

往以安車迎養公卒不行公以長老居家愈益折節
舉宗食指萬計公悉以身下之遇諸少年由由然進
而與之語聞人疾苦輒爲之蹙額不啻加諸其身於
是誦義鄉曲間人人謂公親已里中某子甲喜任俠
有違言諸客謂公彼鯁生易與耳奈何使惡聲及長
者必報之公謝曰彼誠直則我曲也何報使彼不直
曲不在我又何報爲居頃之某子甲竟敗死甲子長
孫道充與計偕伯子則自浙入賀西歸與行會公喜
甚進諸子孫語曰自吾先考以詩書業我卒不成不
自意席先世之靈吾子若孫幸畢吾業勲獨力學而

猶不偶其命也夫力田不如逢年小言可以喻大第
竭爾力必有豐年孺子勉矣伯子遷河南副使以執
禮抗上官上官中之伯子以量移歸省公謂伯子曰
吾遣爾仕務終身蹈禮毋辱先人假令詘禮以求信
辱矣乃今以禮取過即一蹶何病邪居月餘公卒距
生弘治乙卯三月四日閱歲七十二云公配方氏封
安人生伯子納李氏生仲子叔子女一人季年置勝
人奉起居生季子嗣杰孫十二人曾孫一人曾孫女
二人閏月某日伯子奉公喪厝於里之東麓待吉而
後樹墓余惟世方以儒術顯士較其質行或不軌于

正經即冕衣裳猶弁髦耳乃若公之質行率與古人
爲徒則其佑後人以成先志受 璽書被章服有以
也異日採公故實爲之樹不朽之聞則有國之良史
在顧余小子烏足以狀公

明故任子鮑子爲先生狀

世所稱佳公子豈不翩翩乎哉要以質行雅馴不少
概見鮑公子子爲歿鄉人誦義無窮余竊多之遂次
其質行爲之狀公子名孝友字子爲歙棠樾人今左
司馬公適子也初司馬公官御史襁子爲居京師一
時公卿大夫見子爲司馬公所莫不輒然喜也謂鮑

公子才稍長輒能讀父書始勝冠輒籍名縣博士顧
獨傾身下士退讓逡逡於是縣諸生皆推轂予爲稱
賢公子市豪呂氏者私鑿先師廟垣諸生目攝豪亡
敢發子爲宣言曰吾曹誦法先師即壞垣置勿問彼
且焚牧其中耳乃率諸生暴其狀有司抵豪罪完廟
垣於是諸生益重子爲聲名籍籍起矣子爲五舉不
利而爲文日高會司馬公論滇南軍功 詔得任子
則以子爲入太學太學諸生推轂子爲者如縣諸生
及司馬公 賜告居家子爲遂釋業歸養司馬公不
入城府日持醪脯與田間父老游子爲必從必親視

具懼不當意人謂子爲善承高尚之志遂稱綠野先生客謂子爲智者不失時以從事今天子明聖公卿賢大夫才蓋仕者之秋也公子猶然家食謂時何子爲謝曰大人在即一日賢於三公吾所謂時在此不在彼也自司馬公歷開府有事齊秦滇粵之間子爲獨秉家壺稟於禮法尤慷慨慕大義孳孳務振人之窮奉丞嘗歲時唯謹先墓久沒於閭右亟損貲贖還里中西疇書院廢則以先世祠事在焉亟欲改作從伯父由居賈起自大梁病歸用事者利其財蠶食殆盡五子皆憤發羣起而爭子爲借貸居其間爭始

息其後從之收責卒負子爲人言非公子幾覆爾家
奈何負公子子爲徐言曰母居孝友于薄卒罷之從
弟幼孤羣不逞睥睨其產子爲爲之擇所親掌出入
手籍其所有及其長而歸焉中外有急必赴子爲子
爲環而應之一無所失宗人子或不能教則爲之招
致塾師發婦或不能存則月給之食比歲儉則大量
出粟以利農夫平道路繕關梁以利行旅人或以澤
藪之利來告輒閉戶不與通居常折節鄉曲間醇謹
無與比至其繩曲直鏡是非持一切當否即老成人
不及也既脫人於阨不喜人知嘗道湖陰聞旅人喪

童僕以誣抵罪子爲陰使人關說白旅人冤事旣明
旅人不知也以故鄉人無論疏戚即稱長者必曰鮑
公子鮑公子云余自閩放歸子爲之計卒至蓋丙寅
九月二十二日也距生乙酉八月十一日僅春秋四
十有二傷哉子爲娶黃氏有子獻旌亦以司馬公積
勞得補任子息女一適舉人程道充孫男二人長者
字余季女孫女二人幼未字其先世以孝行載郡志
曾大父若大父累贈兵部右侍郎余於子爲爲婚姻
毋敢溢美傷子爲之義特列其獨行較著者稍稍載
之比當大事若志與銘則族國之良史

陽湖吳處士行狀

余嘗浮漸江水則陽湖居上游休寧東南境也其俗
務積著多素封吳氏自石田徙臨溪自臨溪徙陽湖
其先出唐御史少微公後處士名福愷字應和父曰
寄雲母朱氏處士獨子顧善事父母當其心初處士
父與伯氏分財父不直伯氏處士諫曰兄弟直左右
手耳右雖瘠終不衰左以肥之一體之謂何願置勿
問父曰善遂相友如初長從父受成由積著起居常
重然諾雖遇五尺童子未嘗失言齋用既饒猶務纖
嗇出入不問車馬率納履而游客曰處士饒獨跼跼

不遺餘力勞矣處士曰吾分也無寧以勞故廢徒行至其振人之窮無所惜人或相構輒出刀布居其間陰釋之買妾故有身且生子家人欲勿舉處士笑曰此亦人子也舉之長則納婦授金遣歸李氏即李氏子終身父事處士處士絕口不言功嘗入山見毒流取魚者處士蹙然曰嗟乎竭澤無遺類矣奈何以此足一杯羹聞者善其言戒勿復中歲入浙孳孳治生所就業益多居上賈會島夷至大亡其財處士由由然安之脩故業頃之業復起卒未嘗以喜愠示人縣大夫城休寧處士受功唯謹既畢事縣大夫表其閭

處士季年縣大夫以鄉射賓處士處士謝使者惡用
褐寬博爲哉使者三及門卒不就里東爲園若干畝
處士將老焉鄉人謂古有東園公處士近之矣遂號
東園隆慶戊辰處士入浙其年八月望日以疾病終
距生弘治壬戌十月十三日享年六十有七處士娶
程氏納媵女三人子男長繼綬娶榆溪程氏次繼縉
娶由溪程氏女三人長適由溪程湜次適新溪朱杰
次適泰塘程柒處士喪至自浙將厝於某山之原長
子紹介知交抵余爲處士狀比當大事謁作者銘之
處士即鄉曲布衣其人長者余聞之知交而信法得

書

明故吳母鮑孺人行狀

歛閭右大家則棠樾諸鮑溪南諸吳最著孺人出棠樾歸溪南初尚書公許鴻臚君昏吳以素封傾郡者三世矣尚書公官御史孺人歸吳舅姑方以孽子婦視孺人不假貸門內諸姒務求多於孺人孺人恂恂無違言奉舅姑從諸姒後唯謹於是舅姑諸姒一一多孺人賢當是時諸吳方鼎盛率以奢溢相高孺人雖貴富無所芬華非賓祭吉祥不服紈綺於是宗人諸疏屬則又多孺人賢鴻臚君受業大司成孺人自

相內視事躬自貶損出納兢兢至其振人之窮則惟
恐後家監爲市市人或有後言孺人陰遣監子補給
之如其所責且曰此羸彼詘柰何以是苛細賈怨市
中鴻臚君少時不受挫即有所不足將報之孺人從
容爲鴻臚君言君以千金子而仇惡少即得志謂自
輕何鴻臚君以爲然罷勿問於是市井鄉黨莫不多
孺人賢初孺人有子輒殤乃進媵人李姬生二女會
尚書公出填百粵將行語孺人曰女在而翁可無憂
願亟爲吳氏地舉丈夫子若干人吳氏幸甚孺人致
父命力贊鴻臚君納鄧姬居揚州始乳子孺人遣

保母逆其子以身拊之及諸子生乃請鴻臚君載鄧
及諸子歸遂授鄧家秉人曰里婦猶然妒媚何知嗣
親藉以貴人女臨之誰能禁者孺人獨爲吳氏百世
計烝烝然有樛木之風賢矣賢矣長女適太學生殷
宗傳亦以賢聞隆慶改元長女歿尚書公四世獨子
是年喪子既又喪曾孫明年戊辰尚書公卒孺人故
有肺病待醫藥生活者十餘年屬相繼有骨肉之憂
哀之甚夏四月己酉以疾終距生正德己卯冬十二
月戊寅春秋僅五十耳嗟乎孺人以彼其德左右鴻
臚君起家鴻臚君行且入官象服駸駸至矣顧生不

踰中壽歿不逮王章惜也子男五長一清字槐塘程
憲使女次一寧字叢睦坊汪文學女次一貞字長齡
鄭處士女餘尚幼季女爲余長子婦且待期余備在
肺腑親謹列質行爲狀冬十月甲午諸子奉孺人喪
厝桐子山若臨窆窆爲之樹不朽之聞則以喚作者

贈安人江母鄭氏行狀

成化甲午三月七日安人生正德丙子正月二十六
日安人卒始卒叔子瓘述安人質行今載集中嘉靖
甲辰季子珍舉進士己未上南京駕部考得贈父駕
部母安人隆慶己巳季子謝貴州左布政使歸始卜

葬則謂叔兄以子狀毋懼將不徵行且請銘屬余爲
安人狀按鄭世爲周卿士漢末家丹陽其後徙歙居
雙橋又三徙而居澤富處士嵩有長者行故受室于
江則駕部公從姑也是爲安人父母安人幼端靖父
母擇駕部公字之旣歸獨孤在安人視姑如毋姑亦
子視安人安人孳孳務起家終夜績姑戒安人休矣
柰何以家忘身安人謹謝姑比夜輒篝燈績如故姑
弗覺也駕部公負丈夫氣居常歎曰吾欲力農吾鄉
田少比歲凶農安可爲也吾欲力賈吾家薄無以具
資斧賈安可爲也安人從容請曰鄉人賈者什九君

寧以家薄廢賈邪乃脫裝奉駕部公佐公賈公出賈
安人攝中外事悉中羸縮之宜駕部公一切倚辦安
人無卻顧近屬爭立後訟者二十年太守關中彭公
聽之則駕部公當後安人不欲退而語駕部公舉宗
訟者二十年一旦歸我即三尺在謂睥睨者何第委
諸衆瓜分之毋人後爲也於是舉宗高駕部公義愈
益多安人居數年駕部公用賈起即饒益安人攻苦
如初比居姑喪事必易事寡母歲時上甘旨必有常
毋以天年終喪毋視喪姑等門內親有急必抵安人
力不能喪必待安人而舉藥裡家人置產脫不贅貨

者心安人輒私益之曰毋樹怨家人責田租歲侵輒
減租額曰毋以歲厲農即以纖儉發家鄉曲誦義不
絕知大體矣安人四乳子長琇次珮叔季則瓘若珍
駕部公延師授諸子經安人終歲供具日夜程督諸
子望之深及安人終飾巾而視叔子大慟矢言曰毋
繫諸子懼不立爲地下憂異日即自菲薄而傷母心
非子也安人乃瞑叔子卒以稱詩聞然不顯及季子
貴人謂安人始食報云駕部公繼室以某安人舉子
二合四子而六諸孫凡若干人盛矣

明故太學生九洲汪公行狀

公諱尚康字和中吾宗之昭也吾宗遷嚴鎮自時賜
公始歷十二世而公大父元鼎公生是舉丈夫子五
人公父通值公居五五人竝以元宗顯而四五藉藉
首稱父舉丈夫子五人而公居四少有特操父命公
爲儒公席父饒顧折節纖儉逡逡務退讓能下人受
室於程則方伯羅山先生息女公未卒業父以天年
終公既孤唯母氏在遂釋本業去而治生公故握長
筭善任人業大起自惟受父命治經藝乃今折垂天
之翼而遂秋毫遂以貲入成均受業函丈既請告歸
子舍日具庋閣奉母驩公亡其曹繼室以名萬戶女

程舉冢子其淡名舉介子其清其濟其浩其溥其湧
凡六人慎擇可者師塾中程督無勸六子旅進公日
討而訓之而父讀而王父書直將爲而王父地及而
王父見倍而父以逢掖終父命之謂何而父將不得
爲而王父子今也而父無恙是天幸而父而不蔑而
曹藉令而曹終無聞而曹將不得父而父矣公量入
爲出無所芬華獨構近古圖書不遺餘力行年六十
以上治形家言即宗人逋以狐首專門不能詘居常
矜已諾恥詭隨諸所執言不避權力于世不取苟合
而有道者率以此多公歲甲申公負霜露之疾邑人

有醫公祖墓者公力疾聚族而爭之彊歸而疾益深
遂不起季秋十有二日卒于家距生已卯仲春歲計
六十有六公婚六子長室程出長原次程出臨河次
黃出竦川次洪出洪源繼以鄭次鮑皆出同里次程
出翰山女二長歸唐居槐塘次歸潘居同里是爲郡
諸生之愷蓋汀州公孫孫六人國瑾婦方出羅田國
瑜國理婦皆吳並谿南之自出理繼室程出同里國
瑞聘朱方徐氏國玘國珽皆幼待年孫女二人並字
吳氏其一谿南其一中山中山則孝廉子也曾孫女
二人未字余惟巖鎮爲萬家之市吾宗故著市中余

在幼冲則公諸父更伯以今視昔比屋素封林林然
盛矣顧成與虧猶旦夜也其能持久者幾希夫人有
言極盛者難爲繼非繼之難也爲可繼之難也要之
節儉惟直以保其家不失舊物由前則善爲之後由
後則善爲之前繼往開來庶幾爲可繼矣謂之善繼
其誰曰不然近屬將譜吾宗諸長老屬余載筆公諸
子抵余爲公狀余務傳信故于公無溢辭雖然公爲
可繼斯爲可傳幸不辱命

封孺人黃母吳氏狀

歛間右族則黃氏望竦塘吳氏望溪南世婚姻而敵

鉅萬孺人吳之自出嬪于黃嘉靖中則以中書榜貴
封孺人矣先是贈中書公求介婦叩臨江公臨江公
曰息女良是宜字黃公子年十六歸中書君孺人兢
兢以事舅姑無疏節婉婉以相夫子無違言恂恂從
伯姒而下之梱以內無諍語遇羣下廩廩顧所衣鋪
無不饜人人心夙夜衿輦不忘敬戒及中書君既通
籍孺人從都市中故多餓人歲寒尤甚孺人分遣外
監視貿貿來者饑授糒寒授湯甚者授草衣殮授喪
具都人賴多全活歲以爲常癸亥子立朝生納婦甯
氏乳之嫠也孺人察甯怏怏詰其由甯下泣曰夫李

旦夕瘠溝中急自匿而以發鬻婦取易售耳孺人惻然曰不可無寧以乳吾子而鰥人夫遂焚券遣歸不問價後九年而生子立範復大奇人言古者謝勝人而子發家孺人視夫夫賢矣旣中書君以奉使出輒歸休首事宗祠次考居室次賓館次閒居孺人從容諷中書君君出入未央久矣乃今興作不輟將令後世無以加乎昔蕭相國以儉師子孫懼非所以示後世儉也中書君敬諾凡諸義舉則孺人力贊中書君若置田宅以贍諸宗斥塋域以待葬者闢路梁津以通行旅出刀布發倉廩以賑歲凶則曰君所不足者

非財第先鳴毋讓孺人主中饋事事必身親之腰臘
必時酒醴醢醬必適蓋藏必籍出納必稽度閤必登
羸有餘必待乏中書君喜賓客供具悉出中厨不戒
而中羸縮之宜壹如中書君所欲出閨中晝理婦事
夜課女紅即力作不爲疲曰無廢先人云爾蚤歲惟
胤子爲汲汲則請中書君內二姬居常雍雍安二姬
甚顧足不踰閭以身帥之二姬跬步不出于房斬斬
如也孺人雖善食二子猶然以善教佐中書君立朝
年十四輒遣之入成均立範五齡入家塾頃立朝從
中書君往踰月輒趣之歸余竊以爲不然何亟亟也

歸僅越宿孺人以暴疾終蓋丙子冬十一月十六日
距生甲午夏五月五日享年四十三即中壽不逮
矣既中書君入寢室問諸所遺則懸者在懸笥者在
笥書契在篋器幣在函局錫緘滕莫不周慎非先覺
宜不及此抑何繇哉立朝爲余甥方待年而受室鄉
俗即婚姻有成議非畢嘉事不相往來顧中書君獨
親余而孺人亦親余內子及余視孺人喪也無論中
書君若喪主哀毀若將不勝即舉室喪之若地坼而
將安承舉宗喪之若哲人萎而將安放親戚喪之若
喪肺腑羣下喪之若喪栢棧夫亦有所茹於心夫非

涕之無從者矣。孺人舉女子五，其三其五皆出某姬。
長適國子吳士弘，蓋從母黨。次適郡弟子方，以巽是
爲余同年。中丞公子次聘任子殷光，立是爲余同年。
司徒公孫仲子及季女二人，未議婚嫁，二子請余爲
狀，且爲紹介而謁余。同年廷尉王公爲志爲銘，則又
以立傳抵中丞而乞司徒爲墓表。余方從中書君爲
孺人卜地得地，東南隅，幸少休，謹述其大略爲狀。詎
日且近，不避不文，如必以文則諸君子在。

太函集卷之四十一

太函集卷之四十二

新都汪道昆伯玉著

行狀六首

明故封太孺人黃母吳氏行狀

五年秋七月丁未封太孺人黃母吳氏以天年終伯
子鴻臚君仲中書君叔季太學君屬不佞道昆爲太
孺人狀不佞雅善伯而姻仲習叔季間然則知太孺
人宜莫如不佞其年業已爲黃孺人狀乃今復狀太
孺人太孺人若孺人皆系吳氏出溪南而歸竦塘二
姓竝著新都語在前狀新都以瘠而當沃土齒三吳

顧三吳易豪新都務以纖儉持久比者駸駸踰溢梱
以內益滋即中人之家相徬爲汰富者服御比後宮
富既鉅而貴益之又其甚也太孺人溪南之自出故
饒矣及其歸太公也相與戮力而致不貲則傾郡矣
伯仲遞掛職朝寺叔季及諸孫齒胄子者七人太公
旣以中書貤封而太孺人躬受譽命亦旣貴矣脫太
孺人嚮用福澤所不足者豈篋笥度閣乎哉顧在公
官服保傳視衿輦固不自知其饒也鷄鳴以相有家
紡績以訓諸子諸婦衣不完采食不常珍固不自知
其傾郡也以身下近屬睦舉宗以禮下周親振不逮

亦不自知鉅富而貴益之也鄉俗不親媵人不子庶孽太孺人獨親少姬而子叔季迄無間言固不自知其爲樛木爲螽斯也當太公賈淮揚而太孺人處守日討其家屬而訓之曰耕者饁征者衣婦子事也良人出賈千里外凡以爲家而家秉在吾母令不治以勤內顧其訓諸子也則曰男事猶之女紅力則興不力則廢爾曹幸有餘力其務興乎訓諸婦則曰而翁席故資致今日豈徒一手一足哉翁以鐘釜入之吾以圭撮出之翁以鈞石入之吾以豪釐出之吾無它能早服重積之義蓋兢兢矣吾操其一爾曹析而四

焉乃今所入者或儉於鐘金鈞石所出者或踰於圭撮豪釐何以持久爾曹勉之訓諸舍人則曰吾聞之富爲怨府怨豈在明若等第屈首下人毋自召怨太孺人病革顧命諸子曰未亡人倍而父者餘二十年猶及見爾曹所就業乃今相從後矣惟爾兄弟以孝爲友視昔愈益怡怡爾之年皆母之年也太孺人生弘治辛酉秋九月初五日迄今春秋七十有七云得全全昌亦旣壽富多男子矣顧喪太孺人者無論諸子諸孫諸婦盡禮卽諸近屬若周親若鄰里鄉黨莫不盡哀此豈可以衰麻哭泣爲哉殆必有不慚哀而

哀者矣鴻臚君言母雖以纖儉佐家顧獨知大體先
大人出居外里中緩急恃母者無慮數十百家人富
而仁義附焉母庶幾矣里俗任龜策溺堪輿雖巨室
世家往往緩葬以待吉即自太公以上猶大事未終
乃今鴻臚君聚族而謀誓將負俗而從禮卜兆得金
竺山之麓抱癸負丁卜日得季冬乙未之良可以從
事窀穸虛左以待合葬先期紹介不佞謁王廷尉元
美爲志爲銘伯仲故嘗從廷尉游廷尉知伯仲久矣
即不佞無能爲狀庶其志之銘之鴻臚君名極室胡
戶部公孫中書君名榜室即孺人業已有狀叔梯室

吾宗人女季校室吳繼潘太孺人女二人長壻汪大
墳次吳一中皆入太學諸孫入太學者五立忠立孝
立言立義立朝其納婦則許氏汪氏吳氏曹氏許則
中書公女叅知公孫而立朝則余甥也幼者立志聘
吳氏立範立本未聘孫女十有一人嫁者爲程道立
汪居業吳士弘吳時堯皆太學生程則京兆公子汪
則忠愍公子次胡焯則少保公孫次郡諸生方以巽
則中丞公子聘者爲任子殷光立則司徒公孫最幼
者聘羅人偉爲孝廉子吳大安爲太學子其八其九
幼未字曾孫五人繼科聘吳氏繼第聘程氏士華三

輔三奇未聘曾孫女四人長適胡應湯爲孝廉子次適鮑世義爲司徒公孫餘幼未字法得備書

明故程母汪孺人行狀

家大人若諸父習程長公並與長公同業且同齒按察公爲長公弟則又與余同舉於鄉按察言吾兩姓望新都世婚媾而吾家世從汪受室蓋靡不宜孺人出吾宗則信行金紫公後也父景麟母陳氏以弘治壬戌八月十七日生孺人始歸長公旋喪舅而姑太恭人乳按察僅五年太恭人以當室任長公而與按察泣相吊也孺人昧爽上太恭人食退爲叔盥櫛分

甘毳飲食之於是大恭人多孺人授家秉孺人部署
出入則筴長公君方屈首受經歲入浸損有如僕來
者不可命君其如寡母弱弟何夫養者非賈不饒學
者非饒不給君其力賈以爲養而資叔力學以顯親
俱濟矣長公謂善遂以鹽筴賈浙江居數年業駸駸
起既而叔納許氏姒孺人宜之姒坐不得大恭人志
死許以爲構者累歲資斧幾亡而孺人乃自脫橐中
裝與長公更始遇繼室汪氏視疇昔愈宜長公程督
按察受經不遺餘力孺人任終歲供具不少衰按察
數奇長公輒爲之涕泣罷食孺人從容進曰君母見

卯而求旦夜時至固當及晨歲丙午按察賓興又十年乃成進士長公聞此而後喜可知矣太恭人季年孺人帥叔姒逋主中饋梱以內外一切倚辦孺人大者烝嘗次者庋閣次賓客燕享次子舍饗殮又次則羣下畢及於餽餘而孺人獨奉糲食自比於最下者太恭人謂伯仲所就業則冢婦之力居多同爨而畢婚嫁庭無間言蓋垂四十年如一日矣長公既饒益孺人衣大布自如即歲時一繒不終日輒易居常聲不出梱足不踰閭雖庭內爲劇目不及俳優長公程督諸子受經壹如按察孺人雖甚愛諸子然事事必

引于正經及仲季先後上太常孺人無溢喜即不偶
長公大以爲憂孺人從容進嚮者言翼而飛固有時
也太恭人年餘九十則猶恃孺人以爲安于時爲孺
人子若婦者各四人女一人孫十有二人納婦者五
聘者六孫女四人曾孫二人每上堂子姓具在而孺
人奉太恭人愈謹即終老無奪心歲乙亥喪太恭人
孺人憂悸成疾迄丁丑八月二十三日以天年終蓋
春秋七十六矣諸子長者子謙次子諫舉癸酉次子
讓次子諒舉辛酉諸婦長者同里唐氏次叢睦汪氏
次稠墅汪氏次潜川方氏繼父塘胡氏諸孫則從仕

從儒俱縣諸生從任從偉從健從佶從儀從傲從价
從僕從雋從仲諸孫婦娶者則潭渡黃氏呈坎羅氏
自從任以及從健並溪南吳氏聘者則草市孫氏溪
南吳氏方塘胡氏岩鎮胡氏石岡汪氏溪南吳氏曾
孫明元明兆女適叢睦汪蔭槐舉甥希祖壻既倍孺
人畜外孫於家既冠補縣諸生始遣歸室孫女四一
適洪源洪應宜一適羅田方應揚一字草市孫明允
一字洪源洪正寰皆閭右是冬十月幾望諸子將從
俗而殯孺人仲季匍匐及門以狀請長公蓋父之執
而按察兄也余敢無辭比葬若志若銘則余庶幾爲

役且按察在固宜狀孺人仲季則以叔未及祥不遑
文事固也禮三月而葬里俗不然如將待吉而隕毋
之聞諸不肖何以藉手公幸爲毋也狀猶之乎毋也
存異日者藉公寵靈襄人子事則奉公狀而志之銘
之是可僂指也公獨無意乎嗟乎古以蘇季子陳孺
子之能猶然不禮而孺人之遇按察不亦能食能教
者哉無論倨與恭事嫂如母真按察事顧天親不譽
譽則或以爲阿仲季方以傳信望余余固宜代按察
爲孺人狀

誥封宜人程母許氏行狀

不佞事博士先生則與程伯子同舍及不佞始奉

詔歸省伯子亦罷雲南歸奉二尊人驪遂與不佞爲
婚姻蓋爲其幼子士賢請室戊寅先淑人卒年七十
五又三年辛巳五月十二日伯子母許宜人亦卒享
年與先淑人同踰月伯子遣其子國學生士安來請
曰不孝道東奄忽及于大故顧道東所親無若司馬
道東所急亦無若司馬知道東者無若司馬知道東
父母者亦無若司馬母實有懿德道東不忍闕先懿
不彰惟司馬狀之矣道昆敬諾狀曰宜人出潭渡許
氏稱世家父處士昇幼善讀史汪固始見而異之也

遂女焉汪母代許公持家方嚴類固始壺以內肅如
朝廷許公諸姊適程則封公之所自出封公從母而
寧也異諸甥許公謂汪擇壻莫如程姊子母汪謂善
遂以宜人歸封公歸輒得當舅姑稱能婦踰年舉伯
子先是宜人受公官教通孝經小學內則諸篇伯子
生數年王父加諸剌口授伯子書他日叩之即所未
授輒成誦則自宜人授之矣當是時封公以詩起民
間有司推擇應鄉試宜人躬攝家秉事無巨細無恩
封公無何宜人居舅喪封公當室里俗故角力務相
雄即有違言衆者勝矣封公獨子居常退讓逡逡當

是時伯子年少耳暴者日至偶偶無所容宜人卒左
右封公內奉宗祊外應閭里無所失封公自言婦猶
吾友也吾受益居多顧宜人焦思薰心不遺餘力矣
會仲子道南瘵而歿宜人哭之哀久之宜人病蠱壬
子伯子舉于鄉又六年成進士宜人聞此而喜可知
也病始平伯子除尚書郎隸工部使楚取道省里中
尋奉命視河會河決漕且失道司空萬安朱公中
丞吳興潘公在事各持議務相先伯子左右顧而參
和之一切倚辦伯子伯子拮据胼胝不啻以身殉之
嘗覆舟沒橫流卒以天幸得免嘗面叱龍伯夷其宮

宜人聞之安得吾兒著田間冠歸耳會考績 誥封
母宜人河事竣伯子請歸養頃之以不賞見謫量移
深州浮沉州郡郎署者又十年乃出爲雲南守伯子
謝曰即滇南遠在萬里外臣豈憚勞顧臣父母春秋
高無他兄弟請留養宜人不可曰自兒受事將父母
不遑而母雖念而深終不以禽犢而先靡鹽行矣時
世臣方改慮奉約束所部猶將以童牛牯之諸所弛
張悉由守吏更始傳聞故帥數以醢釋憾宜人大以
爲憂及伯子罷雲南歸宜人喜如嚮者家人以爲問
宜人欣欣然語曰吾家外王父以進士發家僅得令

長孺子二千石矣視外王父賢矣乃今歸而父母在也即倍親而躋九列寧不歸邪庚辰宜人疔作執伯子手曰婦胡孫婦汪必稱能婦不幸早死即而毋大歸顧已後之獨士安壯而待息士賢幼而待婚吾嚙嚙耳伯子恍然自失曰何及此也頃之疾良已如平時踰年疔復作尋卒卒之日親者哭之如哭其母疎者哭之如哭所親所知無不實涕者所聞無不悲者相告曰安所復得宜人云伯子又言宜人性至孝母汪即世數十年所宜人每與伯子語淚簌簌不收許公季年歲時饋問比諸子近屬或就宜人策事輒中

事機里婦不及炊日恃宜人舉火凡是與先淑人舉相似也本之聖善其斯爲二姓之符與旬有一日伯子奉宜人喪厝前山待吉而葬于時無遠邇戚疏擁祖道皆來會不佞重伯子之請謹列狀告之

明封承德郎戶部陝西司主事梁山古公行狀
梁山蜀巖邑也自宋淳熙而下對公車者虛無人有的自我郡大夫始邑中故未有以子貴逮再命稱封君有之自承德郎古公始公名書字載道三世以三禮世其家既籍縣增廣生慨慷自負吾邑故隩區也所不足者非地靈吾古氏世家漢東蓋自孝感來徙

將宅是卜惟吉之從別祖爲遲繼別爲敷率以經始
不遑爲儒大父慶鍾僅得崑山簿父桂僅貢澤宮自
始徙以及於今在余小子乃今曠十世而邑無聞曠
五世而宗不振我則非夫奮然務傾其曹崛起故邑
顧考氏中道見倍寡母在焉諸弟若而人諸女弟若
而人率倚辦婚嫁自外人者得所助自內出者得所
歸居者具產行者具裝均若手足率以當室廢本業
不干有司舉丈夫子三伯之愚仲之賢季之道三人
者並受博士禮並廩學宮封君竊自多異日者所就
業宜莫如仲即郡大夫也乙丑郡大夫舉進士封君

聞而喜可知邑人謂上腴不毛一旦崇蘭茁於空谷
伊誰封植之也封君遇諸才子弟不遺餘力而翼之
成所不者目攝之儼然父母師保嘗作古氏家範縣
書以示後人諸子弟承鄉風爲邑里率郡大夫令
元氏封君手書政訓千餘言授之官元氏揭之中庭
奉手澤如面命卒多惠政倣常平立社倉境內迄今
賴之即歲凶無菜色元氏既列高第召入爲度支
郎大農多其材檄主筦庫出入訓言愈厲務清白以
荅上知故主者雅以廉平稱恒自以爲弗及既進
郎中主金城餉申訓言如故金城事事壹如太倉士

馬皆宿飽丁丑畢計自郎署出守撫州封君則曰始
孺子未及丁年吾懼其不任旣浮沉金部吾戒其不
蠲乃今始彊吏事習矣茲得二千石庶幾乎勝任哉
比入朝封君年七十有六郡大夫取道歸覲則庭內
無懼心而職在專城寧詎以而翁故枉道數千里今
日之事君事也民事也遑恤其私行矣比及歲杪封
君以天年終郡大夫卒以觸禁從量移趣歸僅及視
歛生弘治乙丑秋七月歿萬曆庚辰冬十二月其日
則皆二十有五云先是 穆廟以建儲覃恩郡大夫
最元氏封父視子秩授文林郎 今上以兩宮覃恩

郡大夫守戶部主事進封父視子秩加授承德郎乃
今三輔擅場 譽命方至封君不逮矣封君故守逢
掖非藉有土之饒夙夜遑遑務急人之困隣里待之
舉火者千室貸而焚券者千緡賻不舉者歲百餘喪
掩不葬者歲百餘骼爲石梁濟涉者費千餘金里人
呼封君橋迄今稱便丙寅盜起畢掠諸蓋藏里人德
封君輯衆守望以待暴客羣盜鼓行而入虎城里及
封君門前茅譟者三後殿疾呵止者三封君數活吾
曹毋聳封君爲也諸儒生言封君開先若古公亶父
關急若陶朱公居廕若萬石君善俗若庚桑楚知言

矣封君受李氏室繼室以涂贈封皆太安人而郡大夫涂出也內冢婦張氏仲婦高氏是封安人李婦張氏三索得女長適陳萬榮次潘尚忠季來時昇潘來皆文學弟子孫男五德懋德新德昌德宏德恒孫女四封君葬康村鋪黃沙壩之李家地爲馬鬣封乃今墓木翳然蔽牛而墓門之石有待作者昔在丁丑都人士請郡大夫於天官于時譚襄敏先得之聞者快怏其後十年而郡大夫至天帝猶然以良牧賚郡中郡大夫之言曰此中輔邦畿藪文獻此與故郡較輕重金羽然乎哉孤未及下車欣欣有喜色則以先君

子誦義鄉曲闕而不章顧惟相公高時著作之庭衮鉞具在司馬雅以于喁相爲先後不異墳簞願司馬狀之幸得藉手直將徼相公九鼎之重取重九原孤之上願畢矣不佞先世自宋徙千秋里至不佞始以三禮起家不佞無良則先君子之教也先司馬饑渴赴義髣髴封君之風其生也先封君者一年其卒也後封君者一年概相似矣志先司馬墓也者寔惟相公晉之歸人望隣國而哭何以故相近故也以近于親封君則父黨也三王祭川先河後海何以故重本故也本之其所自生封君則衆父父也且也郡大夫

之言在有實錄而無溢辭不佞述之以待命相公相公且然諾之矣

明故處士前洲汪季公行狀

郡中世受素封則吾宗著叢睦九十三翁故長者三索而得季公季公名琨既冠而字之曰良玉翁既服賈察三子能修其業則釋業授之于時賈閩賈吳業駸駸起以鹽筴賈淮海江漢並起不貲即長公璨以主器當中權而季公獨以心計多奇中度遲疾測低昂與時逐猶燭照之長公悉藉季公遠遊歲時遞以方物奉皮閣計程期未達不敢先嘗庭內怡怡無間

言凡諸出納必矜取予嘗貸母錢市鹽數萬羸得可
數千金客說季公此何與伯仲季公謝客如之何後
手足而先秋毫食指旣繁父命各置爨室遂陰署赫
號手割地若干步命三子覆射之季公得近地隣仲
居于仲便尋以其地歸仲易仲所射者以居至其睦
族善鄰急人之困即更僕不易數宗人某納券鬻鹽
季公所買數千金季公語曰與其化也寧居毋薄千
金不待甫踰月增價果千金諸子信從父鰥京師丁
年始反賴季公而給且爲之納羅氏婦之宗人塋之
妻蚤寡宗人佩獨而貧季公月給之錢若米以爲常

瑩妻死曰于我殞于我葬諸子宗正以暴疾卧真州
且待斃季公臨視湯藥饘粥疾竟平故事鹽價出入
悉藉駟僧歲終會之鄒氏僧溢入百金誤也比歲會
季公問歲額贏詘幾何鄒感額曰額詘于昔或有漏
籍無稽矣季公出溢入者歸之曰吾不先發懲爾後
也嘗舟行泊下關前舟覆莫之救公呼旁舟與之約
能活一人者與千錢旁舟爭赴約而活十人卒亡其
五公信關下爲之殞乃行國子生方尚梧故不宜子
則私侍兒有身妻遣侍兒王孺人告季公狀季公曰
善藉令舉子第畜之妻陰使媼問孺人幸殺兒以釋

吾憾及畜子且長尚梧客死建康季公旣歸其喪併歸其子爲之後舉宗德季公甚更其名曰回祖云宋氏弱而不馴季公隣也公柔宋宋益張嘗有家鵠一羣集宋屋上宋伺鵠匿其舍季公一一贖之歸宋以其奇可居遞捕遞贖客憤季公不報奈何爲寔人囚季公謝曰吾終不以從禽而畔隣聽之耳宋由是慙自戢卒服季公先世墓在小練源則造永恩橋以濟涉祠在金紫院則建宗會堂以親親乃若置祭田增封樹立輿主奉神祇則其緒餘也真州掣鹽所地故卑遇雨濘不容足則甃石數百丈以便往來疏戚以

緩急赴之即勞費百端勿恤其自奉率用纖儉服御
曾不逮中人折節下人無少長與鈞禮及二子畢入
太學公始以病脾歸休是歲夏四月癸酉乃至大病
王孺人拊牀而東面二子侍臥起來持肘腋與枕几
俱長孫虞龍持燭几下季公聲遺言起馮几吾生平
從父兄建業不私一錢大兒宗時愛弟而不私甚似
我小兒宗姬從兄而無所失亦似我時當室必能世
吾業而阜昌姬負儁才必能卒振爾業而用譽宜兄
宜弟示爾子孫儀刑吾言止矣既執長孫手命曰異
日者高吾門是在汝復執孺人手語曰孺人故慈二

雛卵而翼矣圖惟厥終幸善自寬毋戚戚也既聞哭
聲復張目援筆而書以示二孤且謝中外則曰人生
自古誰無死死得其正足矣遂瞑距生嘉靖壬午春
秋六十有三王孺人出休陽是生冢子冢婦鮑爲大
司徒孫介子出側室韓介婦羅庶女一婦太學生吳
時薪孫四長即虞龍聘邑諸生潘之屏女次見龍聘
太學生吳希元女次人龍聘太學生方用任女次猶
龍幼未聘孫女五長字洪德明次吳養春次鄭之相
次方如驊其一未字余惟儒者之紬貨殖殆亦引而
自高附以仁義先以躬行則賜何讓思而齊魯不加

于萬石之人也孝弟恭儉濟之以重義而輕財即未必能以屢中方回視萬石君若鴈行矣公二子將奉大事則屬不佞爲狀且謁執政許相公爲傳司寇王長公爲志爲銘季公爲余大父行二子折節坐余東鄉于是爲之實錄庶幾作者有所取材介子駸駸以好古聞兩公且急之矣

明故廣威將軍輕車都尉錦衣衛指揮僉事殷次公狀

古稱翩翩佳公子則魏無忌齊田文要以習禮多文宜莫如吳季子札 高皇帝法文臣非軍功不侯或

世食邑隸羽林郎猶公子也郡中任子以什數顯者
惟殷次君次君生八年尚書公及余始通籍比迎養
兩公子奉王父入燕次君在鴈行魁然加長君尺有
咫既就外傳授家學春秋毋夫人夢水漲庭中尺蠖
蜿蜒沼上角如栗背負六十四鱗以挺引之則季也
尚書公故竒季至是以貴徵也者而益程督之結髮
補郡諸生三應辟皆不偶則以大丈夫當友天下士
我猶未免爲鄉人遂入成均三應辟復不偶憮然歎
曰命也即七十二君無所遇寧能貶素王會尚書公
平古田進百粵督府時島夷海寇輾至重以伏莽連

巢公獨挾二蒼頭輕身徇不測次君乃輒業請以不肖之軀赴之公方代大司寇李公文武分部具在次君操一無至冠側注入轅門百司皆驚公子自天而下亡何倭陷電白尚書公愈益薰心自甲及庚率宵衣侍卧起故事境內聞警始告急告急始發符符至始徵兵兵至始轉餉議未及定敵已鼓行而之他尚書公笑曰雖鞭之長不及馬腹其自今始畫地列戍計口恃糧有警壹以便宜應之不待傳檄而集劑量會計定爲章程諸酋聞之曰往吾儕蹂躪海南如入無人之境乃今在在皆兵在在皆餉難爲寇矣師期

不過三月軍實不過八萬緡上首功二萬七千有奇
寇無噍類凡百悉出公指示次君籌之帷幄者居多
畢事而歸所過分部有私覲者次君正色曰古田之
役輦金數十萬佐軍興家大人什一用之贏者什九
悉付筦庫之士不入秋毫即余小子不才亦各言其
子也不敢聞命悉麾之出覲者主臣上修督府功
蔭授世襲錦衣衛正千戶公陟計相從而入官一夕
皇皇自幕府歸有懼色公問之狀則曰內府廉一名
高者直禮儀房大金吾陰語兒則籍兒名以進公曰
此嘉事也惴惴者何對曰兒故鯁生安能曲事中貴

人可幸無過公曰善第善辭之中夕猶策馬詣大金
吾易他人名而反故牘執政聞之喜謂尚書公即君
鵠雛疇能嚇以腐鼠陽翟大賈行六萬金間近侍將
通河鹽次君偵其私贊公力持不可利實始塞迄今
毋敢覬覦已執事鑾輿司監督大婚工作進秩指
揮僉事南鎮撫司僉書五年考上上賜誥進階廣
威將軍輕車都尉贈吳黃皆恭人其時尚書公復起
留都力請歸老次君亦以使事省覲留滯于舍中公
語次君二親偕老幸無恙君命不可宿也其亟趨
朝次公對曰古人不以一日易三公于一椽杙夫何

有居有頃發黃蒸人即柩內虛無人媵程姬不敢當
夕居常所汲汲者先世丘墓宗廟染盛立東文會館
以倡斯文開績溪水道以通柩載復先達之墓撫先
師之孤所緩急者則近屬孤嫠舉宗貧乏昏授采居
授廬殮授衾棺商授資斧遇道殣則瘞遇歲殺則減
田租家監或不馴必督之過富翁子或因市猾爲貸
必唾面斥之雅習形家言輕千金而主卜既得一區
邑之西牧命曰西校悉索神臯堂斧相望尚書公曰
討其泰甚嗃嗃有言余笑曰郎君具文武功英氣勃
勃得時而駕直將擅場群從鞭撻四夷不爲延州而

爲陵嘗非始願也況以世祿而掩文事以期門而闕武功猶之狐父析薪隋侯彈雀眇乎小矣夫夫固人傑也幸毋以曲士目之公薨然曰好大喜功則其人乎吾不知其傑也歲戊巳次君病脾將帥叔子逆女相門越歲乃發私語不佞二豎子將留行歲十一月尚書公卧里中余躬視公疾次公侍坐乃授餐公疾良已而赴西枝病復作輿歸上里端坐而終其日癸亥日始出矣蓋行年五十庶幾不夭乎哉尚書公卜地吳山潭石源以秋八月庚寅藁葬余備在世講申以婚姻忘年之交竊比莫逆具陳其狀待命大方之

家惟志之銘之誅之傳之庶幾乎旦暮千古矣殷氏
譜曰商易國號爲殷自盤庚始其後封于宋入于陳
漢晉通居丹陽宋偏將承宗始遷歛爲別祖繼別爲
雄甫自南門遷上里居焉九世曰道明十世曰文清
以貲產傾郡中清生頰頰生封兵科給事中鑛並以
當戶累贈戶部尚書至尚書公名正茂累授資德大
夫正治上卿母莊累封夫人出閭右 中宮立嘗從
諸命婦入朝孟希觀也次君息子六長任子光立室
于黃爲中書榜女次任子光彥室于程爲鴻臚汝采
孫女次光奇室吾宗爲孝廉居貞女次光位聘于許

爲政府胄子立德女次光產聘于吳爲太學養京女
次光部遺腹子也未議聘長出吳恭人其二其三其
五出黃恭人其四其六庶也館甥六長爲汪忠愍公
孫嘉嗣次吳鴻臚孫衍祚次吳太學子維新次程司
徒公孫家祚次吳太學子孫二長乾明聘方司
徒公孫女次坤明聘吳太學女聘孫女者爲方京兆
公孫思霸其一待字

太函集卷之四十二